

## **Lenga di mama**

Mas ku 6000 idioma  
na mundu ta eksisti,  
- e mayoria di un minoria,  
pero ta abo, papiamentu,  
mas serka di mi kurason  
mi tin

Ta den bo  
mi ta ekspresá  
detayenan mas ayá  
ku ta zona manera muzik,  
tono i melodía ku kisas  
den e otronan no ta eksistí

Mas ku 6000 lenga  
na mundu ta eksisti,  
pero ta mi lenga di mama  
ku papa i mama na kuchara  
a duna mi mas mi ta tesorá,  
mas na mi kurason mi tin pegá

Mas ku 6000 idioma  
na mundu ta eksisti,  
pero na papiamentu  
literatura nos ta skirbi,  
na papiamentu nos ta tradusí  
obranan internashonal,  
pa nos lenga di mama  
mas ayá nos elevá

Manera e kunukero  
no ta planta solamente  
maishi sino tambe batata dushi

papaya, sòrsaka i kalbas  
pa mayan e kosechá diversidat,  
asina nos tambe mester tesorá  
i protehé kada idioma  
ku na mundu ta eksistí,  
maske e ta di e minoria  
di mas chikí!